



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՇՏԱԲ

375025, ք. Երեւան, Նալբանդյան 130 հեռ. 59-65-94

N 212-1- 2447

<< 28 >> 08 2013թ.

Ձեր՝ 23.08.2013թ. թիվ 2621/1363 գր.

ՀՀ ոստիկանության համակարգի ձերբակալված անձանց պահելու վայրերում հասարակական դիտորդների խմբի նախագահ Հասմիկ Սահակյանին.

Հարգելի տիկին Սահակյան

Հայտնվում է, որ Ձեր 22.07.2013թ. թիվ 2621/1352 գրությանը ՀՀ ոստիկանությունը 21.08.2013թ. թիվ 2/2-1-2361 գրությամբ արդեն իսկ տվել է ոլորտը կարգավորող իրավական ակտերից, ինչպես նաև գրությունում շարադրված փաստերի ուսումնասիրությունից բխող հիմնավոր և սպառիչ պատասխան, ուստի, Ձեր վերոհիշյալ գրությունում շարադրված հարցերի վերաբերյալ կրկնակի ուսումնասիրություններ կատարելու և նոր մեկնաբանություններ տալու անհրաժեշտություն չկա:

Միաժամանակ ևս մեկ անգամ հարկ ենք համարում հիշեցնել, որ <<Հայաստանի Հանրապետության ոստիկանության համակարգի ձերբակալված անձանց վայրերում հասարակական դիտորդների խմբի գործունեության կարգը հաստատելու մասին>> 14.01.2005թ. ՀՀ ոստիկանության պետի թիվ 1-Ն հրամանով, դիտորդների խմբի հաշվետվությունների վերաբերյալ ՀՀ ոստիկանության մեկնաբանությունների բողոքարկման կամ վիճարկման, համապատասխանաբար՝ նաև կրկնակի մեկնաբանությունների ներկայացման ընթացակարգ նախատեսված չէ:

Ելնելով վերոգրյալից, ևս մեկ անգամ խնդրվում է հետայսու ՀՀ ոստիկանության մեկնաբանություններն ընդունել որպես հիմք և դրանց ընթացքը լուծել վերոհիշյալ իրավական ակտի 14-րդ կետով սահմանված կարգով:

պետ, ոստիկանության գեներալ-մայոր

Վ. Եղիազարյան

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ ՀԱՄԱԿԱՐԳԻ
ՁԵՐԲԱԿԱԼՎԱԾ ԱՆՁԱՆՑ ՊԱՀԵԼՈՒ ՎԱՅՐԵՐՈՒՄ ՎԵՐԱՀՄԿՈՂՈՒԹՅՈՒՆ
ԻՐԱԿԱՆԱՑՆՈՂ ՀԱՍԱՐԱԿԱԿԱՆ ԴԻՏՈՂԴԱԿԱՆ ԽՈՒՄԲ

№ 2621/1363

23.08.2013թվ.

ՀՀ ոստիկանության շտաբի պետ,
ոստիկանության գեներալ-մայոր
պարոն՝ Վ. Եղիազարյանին

Հարգելի պարոն Եղիազարյան,


21.08.2013թ. թիվ 2/2-1-2361 գրությամբ Ձեր կողմից մեկնաբանություն էր տրվել Դիտորդական խմբի 22.07.2013թ. թիվ 2621/1352 գրությանը: Նշված մեկնաբանության որոշ կետերի հետ Դիտորդական խումբը համակարծիք չէ՝ հետևյալ պատճառաբանությամբ.

Թերություններին առնչվող.

1. ՀՀ ոստիկանության Կոտայքի ՄՎ Հրազդանի բաժնի ՁՊՎ-ի շենքային դիրքի ոչ բավարար պատճառները չպետք է նպաստի տվյալ ՁՊՎ-ի առաջին և երկրորդ խցերում պահվող անձանց իրավունքների խախտմանը:
2. Ինչ վերաբերվում է այն մեկնաբանությանը, որ «սպիտակեղենի և սրբիչների պոլիէթիլենային թաղանթի մեջ կաչուն ժապավենով փաթեթավորված լինելը դա Դիտորդական խմբի մոտ առաջացած տպավորությունների արդյունք է», դա այդպես չէ, որովհետև Դիտորդական խումբը տպավորություններով, կամայական մեկնաբանություններով և երևակայություններով չի գործում, այլ՝ ցանկացած ներկայացված փաստի վերաբերյալ ունի իր հիմնավոր պատճառաբանությունը: Դիտորդական խումբը տվյալ փաստի կապակցությամբ ունի հիմնավորված կազմված արձանագրություն, որը տվյալ ոստիկանության բաժնի հերթապահ մասի պետը հաստատել է իր ստորագրությամբ:

Խախտումներին առնչվող.

1. Հետախուզվող Գ. Քոչարյանին «Զվարթնոց» օ/կ-ից հայտնաբերելու 11.04.2013թ. ժամը 07⁰⁵-ի Ձեր կողմից տրամադրված տվյալը նրա անձնական գործում ոչ մի տեղ



արձանագրված չի եղել: Այժմ Դիտորդական խմբի համար անհասկանալի է հանգամանքը, թե նշված ժամը որտեղից է վերցվել և դրվել մեկնաբանության մեջ:

2. Իսկ Անդրեյ Զյարիցևի բերման ենթարկելու արձանագրության մեջ հասցեն ճիշտ չգրելու փաստը չի կարելի համեմատել Դիտորդական խմբի կողմից ներկայացված ամսաթվի տեխնիկական վրիպակի հետ, որովհետև ըստ <<ՀՀ ոստիկանության համակարգում գործող ձեռքարկվածներին պահելու վայրերի ներքին կանոնակարգ >> -ի 8-րդ կետի համաձայն. << ՁՊՎ չեն ընդունվում այն անձինք, որոնց վերաբերյալ քրեական հետապնդման մարմնի որոշումը կամ ձեռքարկված արձանագրությունը, կամ քննիչի, դատախազի կամ դատարանի որոշումը լրացված են խախտումներով>>:

Այս ամենից ելնելով Դիտորդական խումբը միանշանակ կրկին կարող է պնդել, որ տվյալ փաստաթուղթը կրել է ձևական բնույթ. եթե ՁՊՎ-ի վարչակազմը ըստ պատշաճի կատարեր իր պարտականությունները, ապա այդ խախտումը բացահայտված կլիներ արդեն իսկ ՁՊՎ ընդունելու ժամանակ:

Միաժամանակ հարկ ենք համարում Ձեր ուշադրությունը հրավիրել այն հանգամանքի վրա, որ Ա. Զյարիցևին 14.06.2013թ. 15⁴⁵-ին խցից դուրս բերելը, դատարան տեղափոխելը, դատարանի դահլիճից ազատ արձակելը, այդքան էլ չի հիմնավորում նրա՝ 72 ժամից ավելի չպահելու փաստը: Որովհետև.

- ✓ ՀՀ քր.դատ.օր-ի 129 հոդվածի 2-րդ մասի համաձայն <<Սույն հոդվածի առաջին մասով նախատեսված հիմքերով ձեռքարկվումը չի կարող տևել արգելանքի վերցնելու պահից 72 ժամից ավելի: Սույն հոդվածի առաջին մասով նախատեսված հիմքերով ձեռքարկվածին արգելանքի վերցնելու պահից 72 ժամվա ընթացքում պետք է մեղադրանք առաջադրվի: Կասկածյալին նշված ժամկետում կարող է մեղադրանք չառաջադրվել, եթե նա արգելանքի վերցվելու պահից 72 ժամվա ընթացքում իր նկատմամբ անազատության մեջ պահելու հետ չկապված խափանման միջոց կիրառելու կամ խափանման միջոց չընտրելու հետևանքով ազատվել է արգելանքից>>:

Արդյունքում նշված անձը պետք է, որ արդեն իսկ ժամը 16⁰⁰-ին վարույթն իրականացնող մարմնի կամ բաժնի պետի որոշման համաձայն ազատ արձակված լիներ ՁՊՎ-ից:

- ✓ Ըստ ՀՀ քր.դատ.օր-ի 132 հոդվածի առաջին մասի՝ <<Ձեռքարկվածը, վարույթն իրականացնող մարմնի որոշման հիման վրա, ենթակա է ազատման, եթե՝

1) չի հաստատվել անձի կողմից քրեական օրենքով չթույլատրված արարք կատարելու մասին կասկածը.

2) բացակայում է անձին արգելանքի տակ պահելու անհրաժեշտությունը.

3) լրացել է ձեռքարկվածին՝ սույն օրենսգրքով սահմանված առավելագույն ժամկետը, և դատարանը մեղադրյալին կալանավորելու մասին որոշում չի կայացրել >>:

Տվյալ դեպքում անձը դատարանի դահլիճից դատավորի որոշմամբ ազատ արձակման ենթակա չէր, որովհետև տվյալ ձերբակալված անձը դատարան տեղափոխվել է վարույթն իրականացնող մարմնի միջնորդությամբ՝ դատարանում խափանման միջոց ընտրելու միջնորդությունը քննարկելու, այլ ոչ թե նրան չկալանավորելու դեպքում ազատ արձակելու հարցը քննարկելու համար:

3. Ինչ վերաբերվում է Գ. Մինասյանի 18.06.2013թ. 17¹¹-ին ազատ արձակելու քննիչի որոշմանը, Դիտորդական խմբի համար անհասկանալի է մնում այն փաստը, որ տվյալ անձը տեղափոխվել է դատարան խափանման միջոց կիրառելու համար, որը դատարանի կողմից կիրառվել է և միաժամանակ փոխարինվել է գրավով, և որից հետո տվյալ անձը այնքան ժամանակ է պահվել այնտեղ ուղեկցող դասակի հետ միասին, մինչև վճարվել է գրավը, որից հետո վարույթն իրականացնող մարմնի կողմից կայացվել է որոշում, որն էլ ուղեկցող դասակի միջոցով փոխանցվել է Հրազդանի բաժնին:

4. Ինչ վերաբերվում է Սերգեյ Թանյանի մասով ներկայացված փաստարկներին՝

✓ Ձեր կողմից անդրադարձ չի կատարվել, նրան <<Զվարթնոց>> օ/կ-ից բերման ենթարկելուց Հրազդանի բաժնում բերման արձանագրությունը կազմելու ժամանակ արգելանքի պահը չգրանցելու վերաբերյալ:

✓ Ինչ վերաբերվում է այն փաստարկին, որ <<Կոտայքի մարզի քննչական բաժնի ՀԿԳ ավագ քննիչ Կ. Գրիգորյանը ղեկավարվել է <<Ձերբակալված և կալանավորված անձանց պահելու մասին>> ՀՀ օրենքի 6-րդ հոդվածի պահանջներով՝ որոշում է կայացրել մեղադրյալ գործող կալանավոր Ս. Թանյանին ՁՊՎ-ում տեղափոխելու մասին>>, Դիտորդական խումբը համակարծիք չէ տվյալ որոշման հետ. ներկայացված օրենքի կետը նախատեսում է՝ կալանավորվածներին պահելու վայրում պահվող անձի ձերբակալվածներին պահելու վայր տեղափոխելը.<<Կալանավորվածներին պահելու վայրի տեղակայման տարածքից կալանավորված անձին ամեն օր փոխադրելու անհնարինության դեպքում, քննչական գործողություններ կատարելու և դատական քննությունը կալանավորվածներին պահելու վայրից դուրս կատարելու կապակցությամբ, քննիչի, դատախազի կամ դատարանի որոշմամբ, կալանավորված անձը կարող է տեղափոխվել Ձերբակալվածներին պահելու վայր՝ մինչև երեք օր տևողությամբ>>: Ավելին՝ տվյալ կարգավիճակում գտնվող անձի ՁՊՎ ընդունվելու և ՁՊՎ-ում պահվելու գործառույթները կանոնակարգվում է ՀՀ քր.դատ.օր-ի 259 հոդվածի 3-րդ կետով և ՀՀ Վճռաբեկ դատարանի 26.12.08թ. ԼԴ/01/0197/06/08 նախադեպային որոշումով:

✓ Իսկ ինչ վերաբերում է մեկնաբանության մեջ նշված այն պնդմանը, որ <<խափանման միջոցը դատարանում ընտրելու մասին և կալանավոր Ս. Թանյանի ՁՊՎ տեղափոխելու քննիչի որոշումը բավարար է և ձերբակալման արձանագրություն կազմելու անհրաժեշտություն չկա և

ձերբակալման արձանագրություն կազմելու դեպքում անհիմն կերպով կփոխվեր Ս. Թանյանի դատավարական կարգավիճակը և կսահմանափակեին նրա իրավունքները, քանի որ կալանավորված անձի իրավունքները առավել ծավալուն են, քան ձերբակալվածինը>>
Դիտորդական խումբը կրկին համակարծիք չէ, որովհետև տվյալ գործառույթները կանոնակարգվում են ՀՀ օրենսդրությամբ:


- ✓ Իսկ ինչ վերաբերվում է այն մեկնաբանությանը, որ <<Ս.Թանյանը ՁՊՎ-ից ազատ է արձակվել բերման ենթարկելու նույն օրը՝ խափանման միջոցը ստորագրությամբ չհեռանալու մասին հիմքով, ուստի ՀՀ Վճռաբեկ դատարանի վերոհիշյալ որոշման 34-րդ կետի պահանջները չեն խախտվել, քանի որ նա 72 ժամը չյրացած ազատ է արձակվել>>:

Դիտորդական խումբը նշվածի հետ կրկին համակարծիք չէ, որովհետև եթե ուշադրություն դարձնենք ՀՀ Վճռաբեկ դատարանի 26.12.2008թ. ԼԴ/01/0197/06/08 նախադեպային որոշման 34-րդ կետի պարզաբանմամբ <<Հետևաբար՝ հետախուզման մեջ գտնվող անձին հայտնաբերելուց հետո նա պետք է անհապաղ (72 ժամվա ընթացքում) տարվի դատավորի մոտ>> մեջ նշված է անհապաղ բառը, որը արդեն իսկ պարզաբանվում է տվյալ որոշման 24-րդ կետով <<... Վճռաբեկ դատարանը գտնում է, որ Կոնվենցիայի 5-րդ հոդվածի 3-րդ կետով սահմանված «անհապաղությունը» ՀՀ քրեական դատավարության իմաստով ձերբակալման եռօրյա ժամկետն է, որից հետո անձը կա՛մ ազատ է արձակվում, կա՛մ մինչդատական վարույթ իրականացնող մարմնի միջնորդության հիման վրա դատարանի որոշմամբ նրա նկատմամբ որպես խափանման միջոց ընտրվում է կալանավորումը>>: Արդյունքում՝ տվյալ կարգավիճակում բացահայտված անձը առաջին հերթին ստանում է ձերբակալվածի կարգավիճակ և պետք է ձերբակալվի հստ նոր ընդունվի ՁՊՎ և որից հետո կատարվեր հետագա գործողությունները:

Այսպիսով՝ խնդրում ենք ևս մեկ անգամ ուսումնասիրել ներկայացված փաստաթղթերը և տալ իրավական գնահատական կատարվածի վերաբերյալ:

Հարգանքներով՝

ՀՀ ոստիկանության համակարգի ձերբակալված անձանց պահելու վայրերում վերահսկողություն իրականացնող հասարակական Դիտորդական խմբի նախագահ՝



Հ. Սահալյան